

UTUSAN MALAYSIA

DATE: 15 / 08 / 2007

Malaysia-Brunei komited teruskan kerjasama

UM - 15/8/2007

BANDAR SERI BEGAWAN

14 Ogos – Malaysia dan Brunei hari ini menyatakan komitmen penuh untuk meneruskan kerjasama erat dalam pelbagai bidang seperti perdagangan, pelaburan, kewangan, pengangkutan serta teknologi komunikasi dan maklumat (ICT).

Kedua-dua negara juga berazam untuk meningkatkan hubungan dua hala bagi sektor pertahanan, kesihatan, pendidikan dan pelancongan yang dilihat saling memberi manfaat.

Perkara tersebut terkandung dalam pernyataan bersama Perundingan Tahunan Ke-11 antara Malaysia-Brunei yang berakhir di sini, hari ini.

Dalam usaha memperluaskan kerjasama dalam bidang perdagangan dan pelaburan, para pegawai kedua-dua buah negara diminta meneroka peluang-peluang dalam industri makanan halal, perbankan Islam dan pelancongan.

Selain itu, Malaysia dan Brunei juga

Kedua-dua negara juga berazam meningkatkan hubungan dua hala bagi sektor pertahanan, kesihatan, pendidikan dan pelancongan yang dilihat saling memberi manfaat

bersetuju untuk membentuk persekitaran perniagaan yang lebih kondusif bagi masyarakat perdagangan di Brunei, Sabah dan Sarawak.

Pada masa yang sama, kedua-dua buah negara akan meneruskan kerjasama dalam sektor pengangkutan udara dan meningkatkan kekerapan penerbangan di antara kedua-dua negara.

Komitmen lain yang digariskan dalam pernyataan bersama itu ialah:-

- Meneruskan komitmen Deklarasi Jantung Borneo yang ditandatangani di Cebu, Filipina pada 12 Januari lalu ke arah pengurusan hutan merentasi sempadan dan pemuliharaan rangkaian kawasan di-

lindungi serta hutan simpan;

- Memberi sokongan kepada persediaan Singapura sebagai tuan rumah Sidang Kemuncak ASEAN Ke-13 bertemakan *Tenaga, Alam Sekitar, Perubahan Iklim dan Pembangunan Mapan*;

- Menerima draf akhir Piagam ASEAN dan pengesahannya oleh ketua-ketua negara ASEAN serta mengakui kepentingannya dalam menjadikan ASEAN sebagai gagasan lebih berkesan;

- Menyambut baik usaha masyarakat antarabangsa termasuk Pertubuhan Bangsa-Bangsa Bersatu (PBB) membantu menyelesaikan konflik di Darfur, Sudan;

- Menyokong segala usaha membawa

keamanan dan kestabilan di Asia Barat terutama Palestin;

- Menyokong kajian semula ke atas Piagam Pertubuhan Persidangan Islam (OIC) yang diharap akan menjadikannya lebih relevan terhadap cabaran semasa;

Kedua-dua pemimpin Perdana Menteri, Datuk Seri Abdullah Ahmad Badawi dan Sultan Hassanal Bolkiah juga bersetuju Perundingan Tahunan Ke-12 diadakan di Malaysia tahun depan.

Sultan Brunei turut menyampaikan ucapan tahniah secara peribadi dan bagi pihak rakyat Brunei kepada Abdullah sempena ulang tahun kemerdekaan negara yang ke-50.

Menurut Sultan Brunei, pencapaian Malaysia selama ini bukan sekadar membawa kepada kemakmuran ekonomi dan pembangunan sosial tetapi turut membolehkan negara jirannya itu menjadi pemimpin di kalangan negara membangun.